

三巖徐謙編輯

物猶如此

汀州伊立勳題



541.26/03

國民二十四年秋月初版

歡迎翻印

◎物猶如此

全部二冊

◎每部祇收特別價洋一角五分

◎上百部九折 千部八折

◎寄費外加 會員免郵


◎每部附贈獎憑一紙

發行所 上海道德書局

地址 上海霞飛路嵩山路口

電話 八二七七四

徐太史真



重刊物猶如此序

物猶如此一書。爲吾邑徐太史白舫晚年所編。太史諱謙。別署鶴子。清庶吉士。性耽善籍。生平刊以行世者約六十餘種。沈文肅公稱其博大精深。集善書之大成。非過譽也。是書搜羅富。徵引切。採擇精。體例嚴。分案弁言外。各加詩箋。以宣其蘊。卽所謂借他對面菱花鏡。各自澄觀自諦。用心於覺世牖民者。重以周矣。間嘗論之人。自二五凝成以來。賦此虛靈不昧之良。莫不具有正性。及其知誘物化。本真旋失。名雖爲人。實無異於禽獸。况復倒行逆施。爲禽獸所不爲者。又不知凡幾。蓋一點虛靈。被六根遮隔。擺脫不開。而正覺不現。并禽獸有不如矣。佛氏有言。蠢動含靈。皆有佛性。編內自孝友。迄通慧。凡十四鑑。以物爲鑑。較以古爲鑑。尤深切。蓋物得氣之偏。尙知止其所止。可以人而不如乎。余夙嗜此書。喜其花樣翻新。足資借鏡。勝他善籍感人深。往歲友人顧沛琦補版。經余一再校對。乙亥春。太原寒世子有志。重刊郵書。索序于兒子鍾時。時轉稟于余。余欣然起曰。有是哉。寒世子之樂善不倦也。洵與余心同理同。志同道同。是卽大善知識也。三生片石。善緣久締。豈必謀面爲相識。而未謀面爲不相識耶。記曰。善歌者使人繼其聲。善教者使

人繼其志。今寒世子繼太史之志。而爲之排印。行見麻沙廣播。太史之墨瀋筆花。悉化爲祥雲甘露。洒遍大千。挽頽風而弭浩劫。胥于是乎在。而寒世子善念之纏綿善機之洋溢。善量之廣大宏深。益無量無邊矣。嗚呼。世人好閱說部。若案頭置此一書。自己朝夕熟玩而憬悟也。世人每積貲財以貽子孫。曷若授此一書。令子孫熟記而憬悟也。真常之道。悟者自得。及早猛省。毋令物類笑人。耿耿此必質之寒世子將毋同時。

中華民國二十有四年歲次乙亥花朝日江西廣豐叔榮林熙恩沐手謹撰

一時勸人以口
百世勸人以書

物猶如此刊竣漫書簡端十首

廣豐白舫徐 謙時年八十有一

性善人爲萬物靈	如何讓物獨惺惺	新翻花樣拈公案	別有傷心老淚零
不乏完人史冊間	貞廉忠孝攷斑斑	塵封可惜拋高閣	都道青天何處攀
且莫驚奇且莫疑	從來萬物聖人師	借他對面菱先鏡	各自澄觀目諦思
去來六道浩無涯	改換皮毛片念差	不朽靈根生意益	淤泥中綻白蓮花
軀殼雖殊性不殊	天光靈炯現真吾	渾侖無物無人始	一個團圓太極圖
不邀福報不邀名	只竭當前徑寸誠	此是乾坤浩然氣	千秋掩卷尙移情
聞風起懦志軒昂	道在天倫日用常	通慧終篇寄深意	齊開法眼認豕鄉
未曾聞見等恆沙	會意何勞載五車	先我同心無限淚	漫將博物擬張華
子雲老矣媿雕蟲	三百詩成感慨中	安得琵琶聲裂帛	不同低唱綠楊風
世情厭故喜聞新	貴物何嘗薄待人	但願人人心轉善	普天孝子與忠臣

物猶如此總目

卷一

孝友鑑【二十四案】

卷二

忠義鑑【二十七案】

卷三

貞烈鑑【二十七案】

卷四

慈愛鑑【三十五案】

卷五

恤孤鑑【十五案】

卷六

眷舊鑑【二十六案】

卷七

踐信鑑【十三案】

卷八

守廉鑑【十五案】

卷九

翼善鑑【十九案】

卷十

救難鑑【二十七案】

卷十一

酬德鑑【三十四案】

卷十二

雪冤鑑【三十一案】

卷十三

知幾鑑【十三案】

卷十四

通慧鑑【二十九案】

徐太史遺筆

孝友鑑

民國二十四年春月上海霞飛路
護生報社營業部道德書局藏版

物猶如此卷之一

孝友鑑目次

孝象

猿拔母箭

猿抱母皮死

犢吞刀

犢藏刀

犢銜刃

孝牛豕

犢排戶

羔臥刀

東莞五乳犬

孝義犬

犬哺母

都押衙犬子

稚犬斃虎

三孝犬

犬啗母骨

李學士宅孝貓

鳥反哺

長興孝鵝豕

蝙蝠識母氣

●以上孝鑑

同母牛

犬痛同懷

羽聲合刻

舁無足蟹過齋

●輯纂祖成明●

●以上友鑑

金剛經百集大註成

●每部定價八角●寄費外加●

物猶如此卷之一

三巖徐

謙鶴子編

鄭

湘靈浦校刊

■孝友鑑【二十四案】

孰無父母。孰無兄弟。猗嗟物兮。孝友如是。歌者傷心。聞者隕涕。輯孝友

●孝象【矩齋雜記】

劉時用言見一老象將死。其子取草飼之。已不能食。則運鼻周拭其身。雙淚如雨。及母死。子泣躍而仆。

鶴子曰。一腔血淚。滴滴從心坎流出。昊天罔極。何處想起。真覺滄海無盡。血淚亦無盡也。

詩箋。乾陀萬里斷歸魂。連鼻周身半淚痕。血乳三年勞苦甚。何能寸草報深恩。

【說文象一乳三年】

●猿拔母箭【聖師錄】

鄧芝射中猿母。見猿子爲母拔箭。吮其血。以木葉塞瘡口。悲哀不已。芝投弩而歎曰。山獸猶哀母。人可不如猿耶。吾從今不獵矣。

詩箋拾橡攀蘿不暫離。弓聲霹靂黑風馳。箭鋒洞處君休喜。看取猿兒吮血時。

●猿抱母皮死【聖師錄】

吉州有捕猿者。殺其母。以皮并其子。賣之龍泉蕭氏。示以母皮。子抱皮跳躑立斃。蕭氏子爲作孝猿傳。

鶴子曰。殺其母。而以皮示其子。不知是何肺腸。傷天地之和。觸鬼神之怒。莫此爲甚。

詩箋孤影空庭落月淒。前宵猶傍白雲栖。驚心瞥見魂銷盡。覓母黃泉掩面啼。

●犢吞刀【柳崖外編】

沐陽縣王屠。鼓刀解牛爲業。買子母牛二。先擬縛宰其母。磨厲以須。適有叩門者。置刀而出。犢乘閒銜刀。至鄰舍孫老家。觸門以角。孫故業農。出見犢口有刀。吞之。猶餘其半。須臾吞畢。對之哀號。方驚異。閒屠以不見犢。與刀尾之來。孫問之。乃知犢之吞刀。蓋不忍其母之就死也。問原值。加倍買之。解母牛縛。牽以來。犢見而號。號而跪。母牛亦臥而舐其首。至尾。孫意謂犢無生理矣。數日竟無恙。後牯牛力田數年。犢亦力田二十餘年。至孫老之子而後死。死後有聞吞刀之異者。剖腹視之。屠刀在腹胃閒。有厚皮包之。如新銳之括於囊橐焉。

柳崖子曰。傳有犢爲其母潛埋屠刀事。近世吾鄉王雅村。亦聞有之。此之吞刀。其情更慘。依依孫老家。力田至死。可謂母子不孤恩矣。

鶴子曰。驚天動地事。僅見此犢。我讀此案。始而咋舌。旣而歛容。旣而墮淚。旣而起舞。

詩箋吞刀鑿鑿莫疑虛。叩角獨尋孫老廬。子母乍逢仰天慟。一時狂喜更何如。

●犢藏刀【同生錄二編】

雲南安寧州趙屠宰一母牛。旣縛矣。入室取桶。其犢在旁。遽銜刀石隙。屠覓刀不得。鄰人告其故。屠不信。取刀置原處。隔窗視之。見其犢如前所爲。趙大悲悔。遂入華山爲道士。日叩神懺悔。養此二牛二十年。死而瘞之。

鶴子曰。此與送羊母子入寺之安屠。皆能發勇猛心。放下屠刀者。寒山子詩。所云蓮花生沸湯也。

詩箋刀頭轉瞬血飛紅。小犢銜刀計已窮。二十年閒隨母飯。華山消受好松風。

●犢銜刀【同生錄二編】

嘉靖乙卯。胡撫鎮賢。統兵禦倭。過臨山。小憩樹下。見屠兒將椎一牛。一犢尙隨乳。私銜利刃至車溝內。以蹄踏沒泥中。屠徧索不獲。胡語其故。後沒於陣。

鶴子曰。藏刀石隙而母幸生。埋刃車溝而母竟死。犢之救母一也。而有幸有不幸。豈非數之前定哉。然孝心耿耿。流傳至今。何嘗磨滅。

詩箋。藏刀深密。畏人知此境。此情良可悲。底事旁觀喜饒舌。累他母子永分離。

●孝牛家【井蛙錄】

金谿前參政漆尉山爲余言。邑南四十里地名九都。田家姓黎者。畜一子母牛。子齒剛半歲。七月閒。田家繫乳牛於家。駕母牛耕隴上。耕畢放牛牧洲渚。日亭午風雨晦冥。雷電交作。牛忽爲霹靂所擊。田家招集隴上人。委斃牛於河。歸見乳牛臥圈中。憐而歎息曰。若母已爲雷擊死於某隴上洲渚矣。乳牛遽起。悲鳴不已。次日黎放牧他所。去洲渚猶里許。卽騰躍奔至其母被擊處。躑躅號咷。不飲不食。屢逐不起。旣而鞭之歸。歸則脫韁逸去。偵之。則復遶哭前處。一晝夜不絕聲。撞地頭破而死。鄉人哀其孝。瘞於死所。封其墓。表曰孝牛冢。至今尙存。此順治丙申七月事。鶴子曰。一乳牛耳。而能傷慟其母如此。且傷慟而竟能以身殉母死如此。詩箋。膝下初離。盼未歸。昨宵含乳夢依依。英靈尋母河洲遍。怒蹴寒濤十丈飛。

●犢排戶【警心錄】

桐廬人畜一牯一犢。同日鬻之。農者取犢。屠者取牯。並驅出門。屠引牯渡溪。入其

家。犢立溪外。引首長鳴。農鞭之不動。促之行。每數步必回顧。越複嶺。穿支徑。至田家。置之欄中。屠夜具湯鑊。旦將烹牴。聞戶外牛鳴甚急。牴應之亦急。屠起視之。則農向所買犢也。排戶而入。跳依母旁。牴亦連舐其頸。屠雖悍忍。惕然動心。反湯滅火而寢。農失犢所在。求之數日。遇屠具言其事。相與歎息。農並以原值贖牴而去。李斯義曰。子鳴母應。情何眷戀。排戶而入。情何急切。讀此令人惻惻。

詩箋。犢來已不望生還。幸母全軀返故山。迢遞屠門溪隔斷。夜深誰引叩柴關。

●羔臥刀【同生錄二編】

邠州屠者安姓。家有牝羊並羔。一日欲刳其母。縛上架之。次其羔忽向安雙跪。前膝兩目涕零。安驚異良久。置刀於地。去喚一童稚共事刳宰。及回。遽失刀。乃爲羔口銜之。置牆陰下。而臥其上。安疑爲鄰人竊。忽轉身趨起。羔兒見刀在腹下。遂頓悟。卽解下。母羊與羔並送僧寺。乞長生。自身尋捨妻孥。投寺內竺大師爲僧。名守思。

鶴子曰。霜鐘一杵。大眾試靜思。此羔瞥見縛母時。若何心碎。跪屠時。若何血迸。臥刀時。若何膽戰。隨母入寺時。若何足蹈。孝哉羔乎。毅哉屠乎。

詩箋。殺機一動幾時休。羔跪屠前枉淚流。轉眼擘開生死路。何人刀下肯回頭。

●東莞五乳犬【陳定九孝犬傳】

孝犬。廣東東莞縣隱士陳恭尹家牝犬子也。牝犬色白而尾辟。四足皆黑。恭尹痛父死國難。矢志不進取。隱居山中。以吟飲自縱。不與時人通。此犬隨恭尹未嘗須臾離。每出則犬先行數百步。若以爲導者。遇豺狼蛇虎。則亟返。嚙恭尹衣袂曳之。還若不使前者。恭尹悟。卽旋犬。犬又隨後離數十步。作大聲嗥。若以爲衛者。以是爲常。夜則於廬舍前後巡。且吠達旦。不少休。數年犬一乳五子。皆牡。旣長。恭尹分贈前後左右鄰家畜。皆能司門戶。不怠。初分之歲。餘母犬日往各家視乳犬。一周若訓之勤者。有食乳犬輒讓母犬食。乳犬旣壯。母犬卽不往視。而乳犬每早輒齊來。恭尹家視母犬。又數年。母犬病癩。瘦將死。乳犬日齊來。爭與母犬舐癩。遂愈。每至元旦。五乳犬輒齊來繞母犬搖尾。若爲母犬賀歲狀。後母犬死。五乳犬皆哀號不止。恭尹憫之。瘞之後山。五乳犬每早輒齊往瘞處哀號。如是者數年不輟。

蘅塘退士曰。此文當與昌黎董生行參看。

鶴子曰。元孝先生高懷亮節。時露詩歌。迄今讀獨漉堂集。忼爽激烈。想見其爲人。此犬託身忠義之門。得其主哉。觀其始終事主忠矣。五子之孝。殆其母忠於所主之冥報乎。

詩箋。劫火餘生笑種瓜。仙厖衛主守煙霞。不慚獨漉堂前走。孝子鍾靈義士家。

●孝義犬【聖師錄】

唐禁軍大校齊瓊家。畜俊犬四。常畋迴廣園。輒飼以粱肉。其一獨填茹咽喉齒牙閒。以出如隱叢薄。然後食。食已則復至。齊竊異之。一日令僕伺其所往。則北垣枯竇有母存焉。老瘠疥穢。吐哺以飼。齊奇歎久之。乃命篋牝犬歸。以敗茵席之餘餅餌飽之。犬則搖尾俛首。若懷知感。爾後擒奸逐狡。指顧如飛。將扈獵。駕前必獲豐賞。逾年牝死。犬加勤効。後齊卒。犬日夜嗥吠。越月將有事於邱隴。留犬以禦奸盜。及懸棺之夕。犬獨來足踣成坎。首叩棺見血。掩土未畢。犬亦斃。

李斯義曰。犬陰養其母。瓊愛犬而並及其母。犬益感恩。可見子之孝親。人物皆然而瓊之恩亦足以致犬之死。則世之不加恩養而欲人之以死効者。亦見之左矣。

詩箋。病母銜恩。袞養豐。赤心報主。死生同。豈惟孝大人閒少。更有棱棱國士風。

●犬哺母【警心錄】

詹材。德興田舍民。家貧。犬生子無食。鹿坡王氏相距半里。求其子歸。飼以糟糠。每食竟卽掉尾返。故處嘔以哺母。至暮復然。風雨不輟。有士人爲賦。孝犬歌。

詩箋。敢辭風雨路艱辛。朝暮徘徊傍母身。安得家家歡菽水。白頭誰念倚闥人。

●都押衙犬子【玉堂閒話】

秦州都押衙石從義家。有大生數子。其一獻戎帥琅琊公。自少至長。與母相隔。及節使率大將與諸校會獵郊原。其犬忽子母相遇於田中。忻喜之貌。殆不可狀。獵罷。各逐主歸。自是其子逐日於使廚內竊肉歸飼其母。至有銜其頭。肚。肩。脇。盈於衙將之家。衙中人罕有知者。

李斯義曰。母子至性。久相隔而偶相遇。其喜自倍於尋常。閱此不覺興感而歎。詩箋宋鵠韓盧蹴陣雲。乍逢母子兩欣欣。何勞考叔嘗羹請。不似東方遺細君。

●稚犬斃虎【警心錄】

村民趙五。其家犬生子甫兩月。隨母行。母爲虎噬。五呼集鄰里壯士持矛逐之。稚犬奔銜虎尾。虎帶之走。犬爲荊棘挂胃。皮毛殆盡。終不肯脫。虎因繫累行遲。衆追及斃刀下。

李斯義曰。稚犬捐軀不顧。真是天性。可見天下巨奸肆虐。匹夫切齒。便可畢命。故惡不可肆。小不可欺。率皆如是。

詩箋犬銜虎尾疾颿馳。虎怒咆哮犬不知。雪滾刀光虎頭落。孝心天亦與扶持。